

**Iniziativa dal pievel „Fermas vischnancas – in ferm chantun“  
(iniziativa per ina refurma territoriala)**



**Argumentaziun**

Il chantun Grischun è surstructurà: var 180 vischnancas, 39 circuls, 11 districts e passa 400 corporaziuns da vischnancas ed uniuns d'interess impedeschan da planisar e d'agir a moda intenziunada ed adequata. La gronda part da las vischnancas è memia pitschna e memia debla (da finanzas) per concepir a moda activa la politica communal. Las autoritads communalas n'han nagina libertad d'agir. Ultra da quai dovran ellas enorm bleras forzas per la collavuraziun en numerusas corporaziuns da vischnancas ed uniuns d'interess. Las fusiuns actualas da vischnancas èn da princip da beneventar. Ellas na schlian però betg il problem sco tal, sa sviluppan mo plaun e savens plitost per casualità. In concept general manca.

La soluziun dals problems per gronda part incontestads è da rinforzar las vischnancas. Las incumbensas centralas sco la politica da terren, la scola, la selvicultura, ils pumpiers duain las vischnancas ademplir a moda autonoma. In rinforzament da las vischnancas signifitga damai dapli autonomia e dapli democrazia.

Il chantun duai mo pli consistier da trais stgalims: il chantun, in plaun intermediar (oz ils districts che stuessan era vegnir reducids numericamain) e las vischnancas. La nova repartiziun duai s'orientar a las particularitads geograficas e topograficas, a la lingua, a la cultura ed a las infrastructures existentas.

In dumber da betg bler dapli che 50 vischnancas è en mintga cas realistic. Sch'ins parta d'in dumber d'abitants da var 190'000 e subtrahescha da quel Cuira cun var 40'000 persunas, restan anc var 150'000 abitantas ed abitants che sa repartan sin radund 50 vischnancas. Quai fa per mintga vischnanca – ord vista puramain aritmetica – var 3'000 persunas. Quai vegn considerà en general sco ina grondezza raschunaivla.

Tant l'uffizi da vischnancas en ses rapport da l'onn 2000, la regenza grischuna en ses messadi davart la refurma da la giustia, sco era l'economia grischuna vegnan a la medema conclusiun sco l'iniziativa. Il comité d'iniziativa dumonda perquai la regenza da concretisar quests princips en in messadi al cussegl grond.

Betg pertutgada da l'iniziativa è la dumonda, schebain i duai dar ultra da las vischnancas politicas era vischnancas burgaisas. Medemamain betg object da l'iniziativa è la procedura d'elecziun per il cussegl grond e per las dretgiras.

**In argumentari detaglià e fegls da suttascripziun pudais Vus retrair qua:**

Comité independent „Refurma territoriala ussa“  
Chascha postala 652  
7001 Cuira

website: [www.gebietsreform-ja.ch](http://www.gebietsreform-ja.ch)  
e-mail: [info@gebietsreform-ja.ch](mailto:info@gebietsreform-ja.ch)